



co, y nan mester a hibe Houston cu urgencia, ya cu docternan a dune 99% di posibilidad di no scapa.

"Pero Dios gracia el a scapa tog y awendia e tin 11 aña di edad, y ta hopi bon. Solamente cu su mayornan a dicidi di bay biba na Hulanda, pero poco dia pasa e mucha tabata na Aruba, y hunto nos a pasa un temporada masha dushi cune", don Mario y sra. Ruth a conta nos di Hola.

DOS ALMA COMPLEMENTARIO:

Den nan adolescencia Mario y Ruth a conoce otro den nan bario van Walbeekstraat. Ruth ta corda cu Mario tabata core rond di su cas riba bicicleta, te un dia cu el a dicidi di acera e damita y papia cune. "Na dado momento mi mama a bin pafo y a mira Mario ta papia cu mi anto pega cu su bicicleta na e muraya di e cas.

Mi mama a bisa Mario pa nos pasa papia paden y di eynan nos a sigui trata otro. Ora e tabata bishita mi, mi tata tabata sinta mey mey di nos, y tambe ora nos tabata bay cine. Leu, leu nos por a tene man di otro. Pero tabata temponan masha dushi mes", sra. Ruth a mencionar.

Aunke nan no ta cay den e mesun signo nan a nace den e mesun luna. Don Mario ta scorpio y sra. Ruth sagitario y nan ta un pareha cu semper ta hunto y nan ta disfruta di nan compania tambe. Don Mario ta mira Ruth como su complemento, e persona cu semper sa di dune apoyo, y unda cu mester, tambe un consejo. Ruth ta sinti cu tur dos ta complementa otro.

Sra. Ruth ta esun cu tin e caracter fuerte, don Mario ta sumamente trankil. Pero nan fundeshi pa ta tanto aña hunto ta no pleita ni zundra otro, compronde otro y dialoga pa resolve cualkier problema. "Nunca nos a bay drumi rabia cu otro", sra. Ruth a indica.

NAN FAMILIA:

Don Mario mes ta bin di un famia forma pa su mayornan y dos yiu, esta don Mario y un ruman muher.

Di su yiunan Janine ta un deportista tambe, pero e no ta practica mas pasobra el a casa. Esun di mas chikito Medwin, kende ta na Hulanda awor aki, tambe ta hunga ping pong, y un biaha el a sali campeon na Florida. El a gradua como Bachelor den Comercio Internacional specializa den logistica y ta traha pa un compania ingles na Den Haag.

Y comosifuera poco, su talento ta grandi pa musica. E ta un musico cu a toca tur caminda di mundo y tur instrumento, y specialmente drum. Incluso el a worde presenta den Center Park di New York hunto cu musiconan grandi di Merca, manera Michael Brant. Y su di dos yiu, Jacinto Mario, tin un habilidad y inteligencia enorme como comerciante, carera cu e ta desaroyando bon na Hulanda.

MAS DEPORTE PA NOS MUCHANAN:

Señor Mario Croes ta haya cu na Aruba mester stimula mas deporte

cerca nos muchanan, tanto for di e mayornan como na school mes. E ta haya cu deporte mester bira un disciplina den e curriculum escolar, pero tambe e mester sali for di e mucha mes.

"E problema di nos muchanan na Aruba ta cu nan a bira mucho malcria. Nan kier pa hende hinca nan den tur cos, pero e iniciativa mester sali di nan mes, pa haci deporte.

E problema mas grandi cu mi ta wak na Aruba ta computer. Muchanan ta sinta dilanti computer dia y anochi y mester busca manera pa nan haci otro cos. Na China, actualmente, nan a traha un clinica pa atende muchanan cu tin adiccion na computer. Y na Aruba tin muchanan adicto na computer loke ta malo pa nan lomba, nan bista, nan man, y ta haci nan mente debil pasobra via computer tin hopi cos malo pa siña", sr. Croes a expresa.

Tambe e ta haya cu mester bin e Ley di Enseñanza Obligatorio, manera ta na Hulanda, y den e programa di les hinca sport aden.

Otro aspecto cu el a menciona ta cu nos muchanan mester di e apoyo di nan mayornan ora nan ta haci deporte, y nan presencia ora tin wega di p.e. baseball of otro, ta hopi importante pa e yiunan sinti proteccion y interes. Pues, no ta cuestion di baha nan riba veld y bay pa bin despues busca e mucha sino di wak nan hunga y duna nan apoyo y estimulo. Don Mario y su señora semper tabata bay wak nan yiu mas chikito tempo cu e tabata hunga baseball.

CAMBIONAN NA ARUBA:

Señor Mario Croes ta mira cu Aruba su desaroyo a bay mucho lihe. "Nos pais a bay dilanti demasiado lihe. E evolucion ta asina lihe cu e parti social a keda atras. Segun mi, e mester a worde planea stap pa stap, y awor mi ta ripara cu e ta bay hopi duro atrobe.

Y e problema di Aruba ta cu nos no ta un pais barata. Mama cu tata mester traha y e ora ey e atencion pa e yiunan no tey manera antes, y hopi mucha ta keda hopi ora sin nan mayornan, y tin hopi hende cu ta hinca cos malo den e muchanan".

PASATEMPO:

Fuera di practica ping pong na cas, pa don Mario ta algo sagrado lanta tur dia 5' or pa haci ehercicio. E tin su sala di Ping Pong na cas y su mashinnan pa gym. Pero loke nos por considera su hobby ta cushina. E ta gusta traha cuminda di mainta y atardi. Tur dia e ta prepara desayuno pa su señora, y ora nan yiunan y nietonan ta bin e ta pasa puntra cada ken kico nan kier come y esey e ta cushina.

També don Mario y Ruth a sa di viaha hopi. Nan a yega di bishita Europa, Sudamerica y Merca, no solamente durante e torneonan deportivo pero pa celebra nan aniversarioonan di casamento.

HOLA Aruba ta gradici don Mario y sra. Ruth pa a ricibi nos den nan hogar, cu hopi calor humano y a habri nan curazon di tal manera cu nos a emociona y tambe a hari, mientras nan a comparti cu nos nan historia di bida, den un forma simple, humilde, y agradable.